

EW NAMOPUNG

Ren fan asengesin angangen attawa, nemenemen me tummunun ewe State Fishery Zone, ika an Chuuk we Saat, me pwan ren ekkoch popun.

Epwe pung me ren ewe Legislature-un Chuuk.

Tetten 1. Itemochan. Ei Annuk epwe iteni ewe State Fishery Zone Act of 1983.

Tetten 2. Popun. Popun ei annuk ren an epwe anisi efefeitaan pekin moni me pwan awora nemenemen me tumunun monun neset non ewe kinikinin nemepien ewe Muun Chuuk fan pungun ewe Constitution an Federated States of Micronesia.

Tetten 3. Awewen Foos. Non an nounou non ei annuk, chinoon chok ika mei pwan sakkono awewen me ren pusin ei annuk, ei foos:

(1) "Atoll", a wewe ngeni ew kukkumosun ika pwanienin ika fen napetamen ooch, non mei wor ew fonu ika fitu non kinikinin kukkumosun we;

(2) "Authority", a wewengeni ewe Truk Maritime Authority mei foruta me ren Annuk No. 3-44;

(3) "Chairman", a wewengeni ewe Chairman non ewe Board non ewe Truk Maritime Authority;

(4) "Manager", a wewengeni ewe Manager non ewe Truk Maritime Authority;

(5) "State", a wewengeni Truk State;

(6) "Fish", a wewengeni monun non saat mei manaw;

(7) "Fishery", a wewengeni:

(a) ew ika chommong sakkun ika tettenin iik, mei affateno napanapan ren an epwe fat me ren pekin nemenemen me tumunun ewe saat, pwe epwe fis pwe mettochun anongonong ren an epwe fat ren pekin geographical, scientific technical, recreational me economic; pwan

(b) angangen attawen ekkewe sakkun me tettenin iik.

(8) "Fishing", a wewengeni:

(a) wesewesen ika satuni ne attawa, angei ika ioni me anniapa iik;

(b) sakkun angang mei esenipato niapeni, angei me ioni iik; ika

(c) met mwokutukut mei fis neset ika nemataw ren anisi me angangen amonata ngeni mwokutukutun ekkewe napanap mei affat asan non kinikinin (a) me (b);

(9) "Fishing Vessel", a wewengeni sein attaw, boat, ship, ika pwan met sakkun sein neset mei wawa ren, appisek ren an epwe wawa ren, ika ewe sakkun wa mei soun aani angangen:

(a) attaw;

(b) anisi efoch ika chommong sein neset me nemataw fansoun attaw, pwan pachenong, nge esap chok pwan aukuk ngeni; amonna, appiseki, isois, apatapat, uwei ika tinano, me fori ika process-ini;

(10) "Foreign Fishing Agreement", a wewengeni etipeew nefinen ewe Authority fan iten ewe Muun Chuuk me ew ika ekkoch kompenien attaw seni nukun ren mumutan wan sein attaw epwe attaw non ewe kinikinin State Fishery Zone an Chuuk. Aw "foreign party" a pwan wewengeni ew party mei pach ika nomw non ewe etipeew me nukun ewe Authority;

(11) "Foreign Fishing", a wewengeni angangen attawa an ekkewe sein attaw:

(a) esemwo register non Chuuk; ika

(b) esap unusenapen waan citizen-in Micronesia; ika

(c) esap unusenapen nemenien citizen-in Micronesia; ika

(d) sein nukun pokiten mei register nukun nge mei saata

ika charter me ren citizen-in Micronesia;

(12) "Island", a wewengeni fonu mei pukun fisita, saat mei pweni unusan meinisin, mei nomw won me tekia seni saat nupwen kun;

(13) "Living Resources", a wewengeni monuset (finfish, mollusks, crustaceans) me iken neset pwan tori pwaset ren met a nomw non tettenin iik, maan mei nomw non shell me ekkewe mei pochokun unucher ren uur, nipwei, me amwatang, me pwan ekkewe sakkun masowen me iraan non saat mei wor manaw non, me nukun mansusun neset;

(14) "Micronesia", a wewengeni Federated States of Micronesia;

(15) "Person", a wewengeni ion aramas, pekin sopai ren corporation, partnership, association, ika met sakkun entity, ika fen pwan ewe Muun Federated States of Micronesia ika ewe Muun Chuuk, ika or kinikiniir kewe ika ar kewe entity, ika muun nukun ika kinikiniir kewe ika ar kewe entity;

(16) "Reef Fish", a wewengeni iken me monun neset mei sou nomw me fisiti pwe nenier arun me won ekkewe ooch me setin arum unukun ekkewe ooch me kinikinin kewe;

(17) "Stock of Fish", a wewengeni sakkun me tettenin iik, kinikinitiwen sakkun faminien iik me tettenin iik ren nenier me iken menni neni ika iken setin ia, ika sakkun tettenin monun neset mei tufich an epwe tumunu me wor angangen fonenir;

(18) "Submerged Reef", a wewengeni muto ika ooch mei mwono fan saat, mei pusin fisita me non saat, ese pwaata won saat nupwen kun;

Tetten 4. Pochokunen ei Annuk. Masowen me kapasen ei annuk epwe pwan pochokun won anusen ewe State Chuuk.

Tetten 5. Kinikinin me Aukukun Kianin Fonu. Kianin fonu a wewengeni ewe kia ika kinikinin unukun ew fonu ese wor ocho-kukkunun me ochonapan (ochen unukun me ochen nukun) mei pweni unukun ewe fonu ika atoll. Ewe kianin unukun fonu ikeweie a poputa me ie kinikinin ewe zone, usun a affat me non ei annuk epwe iei usun kianin:

(1) Ewe kianin unukun ew fonu ika kinikinin fonu ese wor ochokukkunun ika ochonapan, ika met sakkun ochan, a wewengeni ewe kinikinin saat me arosetin ewe fonu, usun a affat me non map forien me noun ewe Muun FSM me Muun Chuuk;

(2) Ewe kianin unukun ew atoll ika ika fonu ika och kinikinin fonu mei wor ochonapan, ochokukkun ika pwan met sakkun ochan mei wor, a wewengeni ewe kinikinin saat mei fiti kirikiroch me pokurekisin nukun ochanapan ewe fonu ikeweie ir mei chufongon me ir me won amuchuun nukun ewe ooch ikaweie mei pwaata me won saat nupwen fansoun kot, usun mei pwa me non saat ika map forien me noun ewe Muun FSM me Muun Chuuk; pwan

(3) Me nukun ei aukuk mei affat asan, ei annuk epwe chok applicable pekinoon ewe ochopok ren ekkewe fonu mei wor ocheer.

Tetten 6. State Fishery Zone. Kianin me non ika nepopun ewe State Fishery Zone me ren ew fonu ika atoll a poputa seni ewe kinikinin saat mei poputa seni unukun ewe fonu, usun a affat pwan aweve me non Tetten 5 me non ei annuk, pwan kianin me nukun ika nesaponon ewe State Fishery Zone a ukutiw me ren ewe kinikin ika ukutiwen me nesaponon ewe engon-me-ruu (12) mile pepe-u nemetaw seni ewe kinikinin aroset usun mei affat pwan aweve me non

Tetten 5 me non ei annuk. Saat pe-ngeni fonu seni ei amuchunoon kinikinin nukun ewe kia, pwan pachenong setin non ekkewe noomw ika lagoons non ekkewe atolls ika fonu a nomw non tettenin setin non ewe kinikin.

Tetten 7. Muto (Submerged Reefs). Ekkewe nemenemen non saat mei affat me ren eoreni me ren aramas ren sou-nono mei nomw won ekkewe muto non ese nifinifin kinikinin ewe State Fishery Zon, me setin nenomw epwe apochokun pwan wor sufonuur.

Tetten 8. Truk Maritime Authority. Me nukun met ekkewe an angang me wisan ika an pochokun mei afat me ren Annuk No. 3-44, ewe Authority epwe pwan aani ekkei wiis, pochokun me angang:

(1) Epwe fori regulations ren tumunun, nemenemen ika angangen me attawen masowen me iken non ewe State Fishery Zone me setin non;

(2) Epwe fori me apunguano etipeewin attaw ngeni sein attawen nukun fan pungun Tetten 10 me non ei annuk, fiti aurour me tipeewin ewe Micronesian Maritime Authority nupwen ewe chon mwochen etipeew i fonuwen nukun, ew kinikinin ika ew an entity;

(3) Epwe atoou fishing permit ngeni sein attawen nukun non napanapen katoou mei foruta me ren ewe Authority, ika fan pungun regulation mei for fan pungun ei annuk;

(4) Epwe apochokuna ngeni me annuku ngeni seni attawen nukun ar repwe akkomwen angei nour taropwen mumutaan attaw ika nour permit me mwen ar repwe tongeni fori ar angangen attaw non setin ewe State Fishery Zone; me

(5) Epwe akukunano ika ekisatiw fan pungun regulation mei kapunguno me ren ewe Authority ewe unusen niwinin taropwen mumuta ika or kinikinin ewe niwin mei ioi fan pungun Tetten 11(7) me non ei annuk me ren ewe join venture seni nukun i mei fori an we sopai fan pungun annuk, ika pwe ewe kekisinooon niwin epwe anisi angangen attaw non Chuuk.

Tetten 9. Angangen Attaw Seni Nukun Mei Mumuta. Esap wor angangen attaw seni nukun mei tonong an epwe attaw pwan fiti pungun kapasen ei anuk epwe tongeni mumuta non ewe State Fishery Zone chinooon chok ika mei wor noun permit mei katou fan pungun ewe pochokun mei kawor non ei annuk. Angangen attaw seni nukun non ewe saat nemenien ewe State Fishery Zone mei pinepin.

Tetten 10. Foreign Fishing Agreement.

(1) Ew etipeewin attaw ngeni seni nukun epwe pwarata pwe ewe Muun Chuuk ina chok ewe a wor ren ewe pochokunen fori etipeewin attaw, usun mei

affat me ren ei annuk

(2) Nupwen an affor won etipeew ngeni seni attawen nukun, ewe Authority epwe nochchei an epwe fis ekkei tetxenin mettoch me ren ewe epeek:

(a) Ewe chon etipeew me ekkewe souwa ika ekkewe ra wisen operate-
ini ekkewe sein attaw mei nomw non ewe etipeew repwe apwoueta me
apochokuna pwan tipeew ngeni an:

(i) ioon ponis ika chon apochokuna annuk mei mumuta an
epwe wisen apochokuna kapasen ei annuk epwe mumuta an epwe tota
won ewe sein attaw seni nukun iwe a search-ini me inspectini ewe
wa ese pwan nifinifin fansoun, iwe pwan arrest-ini me angei met;
usun mei affat me ren Tetten 17 me non ei Annuk nupwen ewe ponis
ika chon apochokuna annuk a fakkun nuku, murin an tota me katon
ewe wa, pwe ewe wa ika aramasen ewe wa a atai ika fori och
mettoch mei pinepin ika annuk me ren Annuk, ika regulations mei
forata me ren ei Authority fan pungun ei Annuk;

(ii) ewe chon search me inspect epwe pwan mumuta an epwe katon
noun ewe sein attaw we permit iwe a pwan tongeni affatatiw usun
ewe napanap e fis ngeni ewe wa non ewe permit mei katou fan pungun
Tetten 11 me non ei Annuk;

(iii) ewe permit noun ewe wa mei katou fan pungun Tetten 11
me non ei Annuk epwe nomw iteiten fansoun meinisin non ewe nenien
kepinin ewe wa, unukun ewe kasi;

(iv) ekkewe pisekin kutta ia wa a nomw ie me nemataw pwan
pisekin affata iten me meni ewe wa epwe nenioch pwan pung nenien
pwan manaw, esap ta me won ewe wa;

(v) ioon chon katon ika ekkewe ra iteni observer noun
ewe State Chuuk repwe pwan mumuta ne fiti me tota won ewe wa
nge met moni ewe Muun Chuuk mei nussuno ren niwinin ewe observer
an nomw me fiti ewe wa epwe reimburse sefan ngeni ewe Muun
Chuuk murin;

(vi) noun ekkewe sein attaw agent epwe kawor pwan nomw
non Chuuk, ir repwe mumuta ar repwe wisen fori me angang won
met mei weweiti me ku ekkewe companien attaw ra tupuni ika
ekkewe souwa ika operator.

(b) ewe chon etipeew seni nukun me ewe souwa ika operator ren
sein attaw wan ewe company mei etipeew, esap achomanga seni met ewe

ukukun sein attaw mei mumuta me foruno ren ewe companien attaw fan
pungun nefiner me ewe Authority;

(c) ekkewe chon etipeew seni nukun repwe:

(i) apply, fan pungun Tetten 11 me non ei Annuk, ren ar
repwe kut nour permit;

(ii) amwitirano me ngeni mwitiri noun ewe wa we permit a
katou fan pungun ei Tetten ngeni ewe wa:

(iii) apochokuna pwan fiti pungun annuk an esap wor sein
attaw seni nukun epwe tongeni attaw non setin ewe State Fishery
Zone ika pwe ese wor noun permit mei valid, iwe pwan apochokuna
pwan fiti pungun met ekkewe mei affat me non ewe permit an mei
annuk ar repwe fori; pwan

(iv) apochokuna pwan fiti pungun an sein attaw seni nukun
resap tongeni attaw non setin non Chuuk.

(d) ewe chon etipeew seni nukun me ewe souwa ika operator won
ekewe sein attaw, fan pungun ar kewe etipeew repwe fiti pungun
meinisin kapasen me masowen ewe etipeew.

(3) Ukukun iik met ew companien attaw epwe tongeni attawa fan pungun
met etipeewin attaw mei for fan pungun ei Annuk, epwe och kinikinin met ewe
ukukun iik sein attawen Chuuk resap niapeni:

(4) Ewe Authority epwe finata ukukun wisen ew kumien etipeew me non
ewe unusenapen aukuukun iik mei tongeni wor pwan mumuta fan pungun ei annuk.
Non an epwe finata ewe aukukun inet ika wiis ngeni ekkewe kumien etipeew ren
attaw, ewe Authority epwe anonga an ekiek won:

(a) ifa ukukun an sein ekkewe kumien etipeew ra sou niniapeni
ewe sakkun iik;

(b) ika ekkewe kumien etipeew ika ar kewe muu mei piin aninnisioch
ngeni ewe Muun Federated States of Micronesia ika fen Muun Truk State
non pekin research non pekin attaw me pwan kутten sakkun iik mei
chooufetan non setin FSM me Chuuk;

(c) ika ekkei kumien etipeewin attaw seni nukun mei aninnisioch
negni Muun FSM me Muun Chuuk ren apochokunen ewe Annukun Fishery Zone
Jurisdiction mei affat non Itenap 52 me non ewe Trust Territory Code,
me pwan kapasen ei Annuk me pwan met sakkun annuk ika regulations mei
for me katou fan pungun pochokunen ach kei authorities; pwan

(d) pwan met ekkena mettoch mei mefi pwe mei namot pwan auchea.

Tetten 11. Fishing Permits.

(1) Esap wor sein attaw seni nukun epwe tongeni fori an angangen attaw non napanapen mei affat me non ei Annuk ren attawen non ewe State Fishery Zone, chinoon chok ika pwe mei wor ika nomw won ewe sein attaw echo noun permit mei valid ika wor pochokunan, pwan katou fan pungun ei Tetten ngeni ena sein attaw.

(2) Fishing permits epwe chok katou fan pungun met a nomw non ewe etipeew mi fis nefinen ewe sein nukun me muun Chuuk; nge met fishing permit mei katou ren attaw fan pungun Kinikinin-Tetten (10) me non ei Tetten esap pwan auchea an epwe katou fan pungun met etipeew mei wor ren ewe sein attaw.

(3) Kumien attaw epwe nounou permits fan pungun etipeew mei fis ngeniir repwe fori ar tungor non taropwen application mei pusin foruta me ren ewe Authority, repwe affetatiw me nukun pwan ekkoch mettoch:

(a) iten me nampaan ewe wa ika pwan met sakkun esinesin ren sein ia ewe wa epwe nounou permit fongon me iten me addressin ewe souwa;

(b) ukukun tonen ewe wa, ukukun osan, parikiin ewe wa, met sakkun an mwesinen fori iik ika process-ini niapan, sakkun an pisekin attaw me pwan sakkun poraus mei namot me auchea ren an epwe sin ewe wa me met mefien ewe Authority;

(c) fite ukukun iik ika tonen iik epwe attawa ren an epwe tongeni uwei won ewe wa non ewe fansoun ewe permit epwe pochokun me pwan fan pungun met masowen ewe etipeew; pwan

(d) ian neni ika non menni kinikinin ewe saat ika zone epwe efisi an attaw ie, ika ineet fansoun ika non meni fansoun epwe fis ewe angangen attaw usun mei affat me ren ewe etipeewin attaw.

(4) Fansoun a tori ewe application, ika pwan ewe application ren ewe kekisinoon niwinin ewe permit, ewe Manager epwe tinano kapin ren emon me emon monun ewe Authority.

(5) Ewe Authority epwe rifiuni ewe application, angei memeeef seni ion aramas non Chuuk mei auchea ngeni, awora mwlich ngeni ese nifinifin aramas ika public hearings ngeni aramas ika mei namot, pwan apungano ika oputa won met anongonong me napanap ika aukuk i ewe Authority epwe pusin mefi ochun.

(6) Ika ewe Authority ese apungano ewe application noun ewe sopain nukun mei katonong me ren ewe sopai, ewe Chairman epwe esine ngeni ewe sopai ika company an ese kapunguno noun we application pwan affatatiw popun kewe ese ketiw ren. Murin an a sinei auchean ekkewe popun an ese ketiw noun we application me ren ewe Authority, ewe sopain attaw epwe ne pwan atononga sefani noun we application non an a forsefan.

(7) Ukukun niwinin me napanapen kamon ewe tufich ne attawa ewe saat an ewe Muun Chuuk ika Zone epwe affatatiw non ewe etipeew.

(8) Fansoun a tour ngeni ewe Authority pwe ewe sopain attaw a etiwa masowen ewe applications ren ekkewe aukuuk, annukun kewe, me masowen non kewe, iwe ewe Chairman epwe ne atoou ewe permit.

(9) Ika pwe ewe sein attaw seni nukun a piin tou ngeni noun permit fan pungun ei Tetten an epwe attaw non ewe nono nge a nounou noun we permit ne fori och foffor mei pinepiu me ren ei Annuk, ika pwan an pakking ika pakkingen tipis esemwo mus ika a nunuseni atun kamusetiwan, ewe Authority epwe:

(a) Rifokuni ika angei sefani ewe permit fiti an epwe ne pwan pusin finata ika esap finata an ewe sopai mei weneiti epwe chiwen angei noun permit ren ewe wa mei itengaw non ewe ier epwe etto murin; ika

(b) Saspn-ini ewe permit non ukukun nangatamen fansoun a mefi mei auchea; ika

(c) Forata pwan ekkoch napanap ika annuk me met ngeni ewe applications noun ewe sopai minneka wan ewe nupwen an pwan katonong murin.

(10) Me nukun met ekkewe pwan masowen ei Annuk ren pochokunan kewe, ewe Authority mei pwan tongeni atoou permit ren ekkoch wewechun popun, ngeni sein nukun ika sopai ren popun mei weneiti pekin research, survey, recreational ika ekkoch pekin mwokutukutun. angang esap ren pekin business ika sopai, non ewe State Fishery Zone ika setin non ewe State Chuuk.

Tetten 12. Foffoor mei Pinepin.

(1) Mei pinepin ika annuk an emon aramas:

(a) Epwe atai och kapasen ei Annuk, ika kapasen ei Annuk, ika kapasen och regulation ika permit mei katou fan pungun ei Annuk;

(b) Epwe wawa efoch sein attaw ren an epwe attaw nupwen fansoun a fen rifook ika katano noun we permit, ika fansoun mei saspn noun we permit, mei katou fan pungun ei annuk;

(c) Epwe atai kapasen. ika masowen met regulation ren, met agreement ika etipeew mei fis me for pwan katou fan pungun ei annuk;

(d) Epwe chipwang ne mutata ika ese mutata an ewe chon apochokuna ei annuk an epwe tota won ewe sein attaw mei wenengeni an epwe tota won ren an epwe chosa ika cheki ika search-ini ika inspect-ini fan pungun angangen apochokuna masowen ei annuk, regulation, permit, ika etipeew mei affat me katou fan pungun ei Annuk;

(e) Epwe apochokun ngeni non napanapen fiu ngeni, opponuwa, ika efeiengawa ika fen eppet ika u-ngeni pwan asoonga ewe mei mumuta an epwe fori ewe angangen apochokuna mwokutukutun ei annuk ren pekkin chekin me chosan met a mwochen nusun mei affat non kinikinin (d) me non ei Kinikinin-Tetten;

(f) Epwe opponuwa me fiu ngeni angangen arees mei fis ren met napanap mei fis mei atai kapasen ei annuk;

(g) E tinano, shipini, amomo, tingor epwe wor kamo, moni, importuni, angei me isois, ika fen anamwu fan an pochokun met ika mei angang ika niapeni ika attaw me non ei setin Chuuk fan pungun mwokutukutun attaw mei atai kapasen ei annuk, regulation, permit me agreement ika etipeew mei katou fan pungun ei annuk; ika

(h) Epwe auosukosuka, ammangano, eppet, non ese nifinifin napanapan, met a angan aresiniion aramas, nge i mei sinei pwe ewe aramas epwe arees mei atai pungun annukun ei saat me ei annuk.

(2) Mei atai annuk ren an sein attaw seni nukun epwe fori angangen attaw non setin Chuuk ika kinikinin ewe State Fishery Zone, ese nifinifin ika ewe sou-wa saano ika kaptin, chinoon chok ika ewe angangen attaw mei mumuta pwan fis non met napanapen attaw me mwokutun attaw mei pwarata me affat non noun ewe wa we taropwen attaw ika permit mei katou fan pungun Tetten 11 me non ei Annuk.

Tetten 13. Niwinin Pakkingen Tipis.

(1) Ioon aramas a punguno non kapungun kutta niwinin taan ewe annuk ren moni pwe i a tipis ren an fori och napanap mei pinepin me ren Tetten 12 me non ei Annuk, epwe tongeni mooni ngeni ewe Muun Chuuk met niwinin an atai ewe annuk. Ukukun niwinin ewe tipis esap tekia seni \$75,000 ren ew taan kapasen ei Annuk. Ew raan mei sopesopono fisin ewe taan masowen ei annuk epwe pwan forata pwan ew niwinin tipis me nukun ewe. Ren kутten aukukun niwinin tipis ren taan masowen ei annuk, ewe kapung epwe pwan nennengeni napanapen ewe foffor, popun ika wewechun an fis ewe foffor, ifa ukukun ewe napanap, met sakkun ewe foffor ren pekin sapongawan me ika ewe chon fori ewe foffor mei

ifa sakkun aramas, pwan uruwoon manawen aramas ren foforongawan me mwan, me pwan met ewe soukapung epwe pwan require-ini.

(2) Ewe State Attorney General mei mumuta an epwe atoura ngeni kapung meinisin case pwan pusin fori angangen mwokutun pekin atoura ngeni kapung me etipisi fofforongawen me taan ei annuk, pwan wisen tinikeni an epwe fis ekkewe pakking me niwinin taan ewe annuk. Moni tonong seni pakkingen taan ei annuk epwe no ngeni ewe Monienapen ewe Muun Chuuk.

Tetten 14. Tipisin Atai Annuk.

(1) Emon aramas epwe tipis ren ew foffor ika pwe i e atai ika fori ew fofoor mei pinepin me ren Tetten 12 me non ei Annuk.

(2) Foffor mei nomw non tettenin pinepin me ren Tetten 12(1)(a), (b), (c), ika (g), epwe tipis won ukukun esap nap seni \$50,000 pakking.

(3) Foffor mei nomw non tettenin fofor mei pinepin me ren Tetten 12(1) (d), (e), (f), ika (h), epwe tipis won ukukun esap nap seni \$100,000, ika kanupus non fansoun esap nangatam seni ruu ier, ika ir me ruu, chinoon chok ika ewe foffor e fis nge ewe chon fori mei nounou pisekin efeiengaw, efeiengawa inisin ewe a wisen apochokuna masowen ei annuk, ika e mochen efeingawa ika akinas a inisin ewe chon apochokuna masowen ei annuk, tipisin epwe pakking won esap nap seni \$25,000, ika kanupus non nangatamen esap nap seni engon ier, ika ir me ruu.

(4) Foffor mei affat pwe mei pinepin me ren Tetten 12(2), epwe tipis won esap nap seni \$100,000 pakking. Ew ranin sopesoponon fofforongaw ika atai pungun ei annuk epwe pwan ew tipis me nukun ewe.

Tetten 15. Ataeno Nemeneman ika Forfit.

(1) Menni sein attaw, pwan pachenong pisekin attaw meinisin won, pisekin non ika woon ren furniture, me pisekisekin me pisekisekin ewe wa, sitowa, met osan pisek ren cargo, niaper iik, me mettochun meinisin ewe wa epwe katano nemeneman ren an epwene nomw fan nemenien ewe Muun Chuuk ren tipisin ewe fofforongaw mei pinepin me ren Tetten 12 me non ei Annuk. Ei katanoon nemenemen ewe wa me mettoch meinisin non me won epwe fis fan pungun met kapungun tipisin taan ei annuk mei fis fan pungun ei annuk.

(2) Ewe Kapung mei wor an nemenem won ewe tipis me non ewe State Chuuk epwe, fan pungun application ika tungor mei katonong seni ewe State Attorney General non Chuuk, fan iten ewe Muun Chuuk, order-ini an ewe wa me pisekin kewe meinisin repwe forfit ngeni fan nemenien ewe Muun Chuuk, usun mei mumuta non Kinikinin-Tetten (1) me non ei Tetten.

(3) Ika a tou pungun kapungun katanoon nenenem won efoch sein attaw fan pungun ei Tetten, ewe State Attorney General epwe angei non pochokun met pisek ika met sakkun interest a fen punguno pwe a forfit ngeni ewe Muun Chuuk, nge mei chok nonnomw, esemwo no-ngeni ewe Muun Chuuk fan pungun ei Annuk.

(4) Ewe wa a forfit ika no-ngeni nenenien ewe Muun Chuuk, fongon me pisekin won ren pisekin attaw, furniture, pisekikisin, sitowa, cargo me iik mei tongeni amomo ngeni aramas, iwe monian epwe tonong non ewe Monienapen Muun Chuuk, ika pwan nomw ren an epwe wor aear me ren ewe Muun Chuuk, ika isols fan pungun me ren ewe Muun Chuuk ren an epwe einet me ren ewe Authority ngeni iokewe nou-soao, mei fis ie ewe fofforongaw forien ewe sein attawen nukun.

(5) Fansoun awitiwitin atawenoon ewe kapunguno katanoon nenenem, ewe kapung mei tongeni atoou ewe wa, fongon me mettochun ika pisekin kewe ren pisekin attaw, furniture, pisekikisin, an sitowa, cargo, niapan iik ika metekewe won ewe wa, nupwen a wor bond ika security epwe kamotiw ngeni ewe kapung. Pochokunen ewe bond ika security epwe chok anongonong won totoon ekkewe pisek me ren ewe a awora ewe bond, ngeni ewe kapung nupwen a wor order me ren ewe kapung, nge ren ukukun namoten ekkewe pisek esap pwan siwin ika kukkununo, ika met ukukun ewe security non foufoun moni ika pwe ewe kapung mei pwan orderini pwe epwe ina usun. Metewe pungun kapung ren ewe bond me security won met ukukun masower mei tongeni kamosefan non aukukun ewe principal me ewe security nupwen me ika a wor mwaninoon me tanoon ewe etipeewin bond me security, ika pwe ewe kapung a mefi pwe epwe ina usun.

(6) Met iik mei tonong ika feito seni met angangen forfit mei fis, epwe amomono fiti pungunoon me ren kapung. Monien ewe amomo iik epwe katonong ngeni ewe kapung ren an epwe awitiwiti wesinoon ewe angangen kapungun forfit.

(7) Fan iten ei Annuk, epwe ew oumoum mei tongeni wor anini won, an emon epwe forano pwe ekkewe iik mei nomw won ewe sein attaw mei oono ren an fori och fofoor mei pinepin me ren Tetten 12 me non ei annuk re niapeni ika attawa non napanapen atai pungun ei annuk.

Tetten 16. Fees ika Monien Niwinin Permit. Fees ika niwinin permit mei loi

me ren ewe Authority fan pungun Tetten 11(7) epwe tonong non ewe Monienapen ewe Muun Chuuk; Nge ren fees mei tonong seni ew joint fishing venture, ika noun we application ren noun permit mei pwan pachenong tungoren an ewe kukunono niwinin noun we permit ika tungoren epwe wor an rebate won ewe fees, nge ewe Authority mei tipeew ngeni ewe application nge esemwo apungano ewe tungoron rebate ren ewe fees, iwe ewe moni epwe tonong non ew sakkun account epwe iteni trust account non ewe Authority tori an epwe punguno ewe tungoren rebate pwan kamotiw me ren ewe joint venture, ika katonong non ewe Monienap nupwen a punguno pwe ese mumuta ika kapunguno ewe tungoron rebate.

Tetten 17. Apochokunan.

(1) Akkaewin me wonapanapen sekining ren apochokunen ei annuk epwe nomw ren ewe State Attorney General.

(2) Ioon Officer i mei kefinita pwan mumuta me ren ewe State Attorney General an epwe apochokuna masowen ei annuk mei tongeni:

(a) Fan pochokunen warrant ika pwan mwo ren an ese wor warrant ika ekkewe sakkun taropwen pochokunen angang:

i) Aresini emon aramas, nupwen a wesewesen wor an nuku pwe ewe aramas a fori ew fofoor mei pinepin me ren Tetten 12 me non ei Annuk;

ii) Tota won ewe sein attaw ren an epwe cheki ika search-ini ika inspect-ini ewe wa mei nomw fan pochokunen ei annuk;

iii) Angei ika nuki non pochokun meni sein attaw mei nomw non angangen me mwokutukutun taan masowen ei annuk;

iv) Angei ika uwei non pochokun pisekin attaw, furniture, pisekikisin, pisekin ekkewe sano, cargo; me niapan iik mei nomw wen ewe wa mei oono ika tipis fan pungun ewe pochokun mei mumuta me ren Kinikinin (iii) me non ei Kinikin; pwan


v) Angei non pochokun met sakkopaten mettochun pwarata ika evidence mei auchea ngeni pwarataan taan masowen ei annuk.


(b) Fori uwokutun met warrant ika taropwen fori angang non pochokun mei katou me ren menni kapung mei wor an pochokun won ewe mettoch.

(c) Pwan fori ekkoch okkuno non pochokun mei katou fan pungun annuk.

Tetten 18. Pochokunen Och me Och Tetten. Ika och masowen ei annuk ika ekkesiwin ika fen och s'oposopun, ika pochokunen won emon aramas, och mettoch ika och napanap a katano pochokunan me manamanan, iwe ewe kataho ren ewe manaman me pochokun esap pwan kuu ika apechanong ekkewe ekkoch masowen ei annuk, ika ekkewe ekkesiwin me s'oposopun fongon me pochokuner kewe, pwe ir mei chok pochokun, iwe non ei napanap, masowen ei annuk me met ekkesiwin ika s'oposopun masowan mei kawor murin me pochokunan won aramas ika mettoch ika och napanap, mei tongeni kinikinitiw won en me an pochokun.

Tetten 19. Poputan Pochokunan. Ei Namopung epwe poputa pochokunan fansoun kapungunoon me ren Kepina, ika fansoun an pusin winiti annuk won winikapan.

Sain seni: 
Kisande Sos, Speaker
Truk State Legislature

Annetata: 
Datasi Albert
Legislative Chief Clerk
Truk State Legislature

Pwinin maram: 2/2/84

Kapunguno seni: 
Erhart Aten, Governor
Truk State Government

Pwinin maram: April 5, 1984